

JUN TSA' BA I TS'IJBU JUDAS

Judas ti' ts'ijbubeyob jun jini tsa' ba i paya
Dios cha'an i ch'ujbiñob

1 ¹ Joñon Judason. Ajtroñelon i cha'an Jesucristo ti pejtyeel c pusic'al. I yijts'iñon Jacobo. Mic ts'ijbubeñetla ili jun tsa' ba pajyiyetla ti Dios lac Tyat cha'an mi la' ch'ujbin cha'an ajcotyaya lac cha'an Cristo yic'ot cha'an mi la' wajñel ti i cha'añetla ti junyajlel. Cañatyabiletla ti Jesucristo como mi la' tyem ajñel la' wic'ot.
² La' bej más oq'uisabentiquetla cabal i yutslel i pusic'al Dios yic'ot i ñach'tyalel yic'ot i p'untyaya Dios.

Jini mu' ba ti lot ba cantisa
(2 Pedro 2.1-17)

³ P'untyabilet ba la hermañujob, ti pejtyeel c pusic'al com c ts'ijbubeñetla ti cubi cha'an laj cotyantyel. Pero wale c'ajñibal mic wa' ts'ijbubeñetla cha'an mic subeñetla cha'an la' cha'len wersa cha'an jini ts'acal ba yom mi ch'ujbintyel. Jiñlach jini t'an tsa' ba junyajlel aq'uentiyob i cha'año' ba Dios.
⁴ Como cha'an ti' lotiyetla tsa'ix i lolon otla i ba la' wic'ot cha'tiquil uxtiquilob che' bajche' jini tsa'ix ba wa tyajle ti t'an ti Ts'ijbubil ba i T'an Dios c'ala oniyix bajche' mi quejel i xot'e' i mul. Simaroñob. Cha'an yujil isujm uts Dios, mi' lolon ac' i ba ti melol cha ba bajñel yom i tsucul pusic'al. Mach'an mi' ch'ujbiñob cha'an Diosach jini cojach ba lac Yum yic'ot lac Yum Jesucristo.
⁵ Com c cha' c'ajtisabeñetla aunque la' wujilix isujm lac Yum ti' ñaxan payayob loq'uel ya' ti pañimil Egipto ba i c'aba' pejtyeel jini israelob, pero ti wi'il ti' jisayob mach ba ba'an ti' ch'ujbiyob cha'an Dios mi quej i bej cotyan.
⁶ An ajtroñelob i cha'an Dios ch'oyolo' ba ti panchan tsa' ba i clyayob i chumlib ba'an Dios che' ñac ti' clyayob i melob

che' bajche' yom Dios. Dios ti yotsa ti calchol ti ic't'ojñal. Calchal ti cadena yubil c'ala jintyo ba' ba ora mi tyalel jini ñuc ba q'uin che' mi quejel i cha'len melojel Dios.

⁷ Che' je'el lajal ti' cha'leyob i tsuculel jini año' ba ti Sodoma yic'ot Gomorra ba i c'aba'ob yic'ot jini yamba lum tyac ya' ba an lac'al ya' ba'año. Lajal ti' cha'leyob bajche' jini ajtroñelob i cha'an Dios ch'oyolo' ba ti panchan tsa' ba i cha'le i tsuculel. Ti' cha'leyob i tsuculel jini mach ba ba'an ba' ba ora mi' cha'leño. Jini año' ba ti Sodoma yic'ot Gomorra mi clytyal ti ajpasoñel che' bajche' ti jili ti c'ajc. Cha'ach mi quej i yujtyel ti pejtyeel mu' ba i ñusaño wocol ti c'ajc ti caj i mul. Jiñlach c'ajc mach ba ba'an mi yajpel.

⁸ Cha'ach je'el ili xlot ba ajcantisajob. Mi' ñaxan bajñel pensalin cha ba ti simaronlel yom i cha'leño cha'an mi' bibi'saño i ba ti i tsuculel. Mi' mich'q'uel i p'atyalel i t'an lac Yum. Mi' wajlen jini año' ba i ñuclel.

⁹ Jini ñoj ñuc ba ajtroñel i cha'an Dios ch'oyol ba ti panchan Miguel ba i c'aba' che' ti' contra i ba yic'ot jini xiba ti' calax pejcyob i ba cha'an i bac'tyal Moisés. Pero mach'an ti' chan isla i ba jini Miguel cha'an i yal'en jini xiba. Tsa' jach i yala: La' i tiq'uet lac Yum. Che' yalol jini xiba.

¹⁰ Pero jini xlot ba ajcantisajob mi' lolon tyaje' ti mach ba wen ba t'an cha ba jach mach ba ba'an mi' ch'ambeño isujm. Pero aunque an jini mu' ba i bajñel caño quixtyaño che' bajche' mi bajñel can animal, pero jiñlach jini mu' ba i paye' majlel ba' mi majlel i ñusan wocol ti caj i mul.

¹¹ P'ump'uño. Mi quejel i ñusan wocol como tsa'ix i tsacle majlel i cha'libal Caín tsa' ba i cha'le i simaronlel. Cha'an jach wersa yom i ganarin tyaq'uin, ti junyajlel

yac'ayob i ba i lotin quixtyañujob che' bajche' ti' cha'le ti ñoj oniyix jini Balaam ba i c'aba' je'el. Mi quej i jilelob cha'an cha'lach mi' contrajinob Dios che' bajche' Coré tsa' ba tsansanti cha'an ti' cha'le contrajiya ti' tyojlel Moisés.

12 Quisintic bajche' mi' cha'len jini xlot ba ajcantisajob. Mi' motin cha'len uch'el la' wic'ot che' mi la' motin cha'len uch'el ba' mi tsictiyel mi la' p'untyan la' ba. Wen tijicña mi' cha'len uch'el la' wic'ot. Como mach'an mi' saj cha'len baq'uen che' mi' cha'len jini uch'el. Lajalob xlot ba ajcantisajob bajche' ajcanta'ya tiñame' mu' jach ba i lolon bajñel cañtayañob i ba. Lajalob bajche' tyocal mu' jach ba i rajyel majlel ti ic' mach ba ba'an mi yac' ja'el. Lajalob bajche' tye' tyac mach ba ba'an mi' yac' i wut ti yorojlel. Junyajlel tyalqu'inix yubil. Tsa'ix bojqui loq'uel yubil.

13 Lajalob jini xlot ba ajcantisajob bajche' babaq'uen ba witslaw ba ja' ti mar che' mi yac' bibajax ba i lojc. Jini quisintic ba i cha'lival lajal bajche' jini bibajax ba i lojc ja'. Lajalob jini xlot ba ajcantisajob bajche' ec' tyac tsa'ix ba i satya i bijlel yubil. Tsa'ix wa ajli mi quej i ñusan wocol jini xlot ba ajcantisajob ti ic't'ojñal cha'an ti bele' ora.

14 Che' je'el Enoc ba i c'aba' jinlax i sietejlelix ba i jinlajlel Adán. Ti' tyajayob ti t'an jini quixtyañujob. Ti yala cha'an ti xijq'ui ti Dios i yale' jini Enoc: Ti quila lac Yum ti tyali yic'ot ti mil ti mil i cha'año' ba.

15 Ti tyali cha'an i melob ti pejtyelex quixtyañujob yic'ot cha'an i choc majlel ba' mi' ñusan wocol ti pejtyel jini simaroño' ba cha'an ti caj pejtyelex mach ba wen ba tsa' ba i cha'leyob yic'ot cha'an ti pejtyelex mach ba wen ba t'an tsa' ba i yalayob ti' contra Dios. Che' ti yala Enoc.

16 Jini xlot ba ajcantisisa mi' bej cha'len t'an cha'an mach'an mi' mulan cha ba mi yujtyel. Mi' bej ale' cha ba jach mi yujtyel. Muc' jach i bej saclan bajche' mi' mel cha ba yom i bajñel tsucul pusic'al. Mi' chan isan i ba ti i t'an. Mi' lolon

suben ti wen ba t'an quixtyañu cha'an jach yom mi' bajñel tyaj i ñuclel ti caj.

Lac xic'ol cha'an bajche' yom mi yajñel ochemo' ba ti' t'an Dios

17 Pero jatyetla p'untyabilet ba la quermañujob, c'ajtisanla cha ba ti yala jini yajcabilo' ba ajsubt'añoñob ñumel i cha'an lac Yum Jesucristo.

18 Ti' subeyetla: Ti jini cojix ba q'uin tyac mi quej i yajñel quixtyañujob muc' jach ba i wajlen i cha'an tyac ba Dios. Mi quej i bajñel ajñel bajche' mi' mulan i cha'len ti tsucul ba i pusic'al.

19 Jin xlot ba ajcantisisa mi yalq'uen i t'oxob i ba hermañujob. Mi' cha'leñob cha ba jach yom i bajñel i pusic'al. Ma'ix Ch'ujul ba i Ch'ujlel Dios yic'otyob.

20 Pero jatyetla p'untyabilet ba la quermañujob, xuc'chocon la' ba ti jini ch'ujul ba t'an mu' ba la' ch'ujbin.

Cha'lenla oración cha'an ti i p'alyalel Ch'ujul ba i Ch'ujlel Dios la' wic'ot.

21 Bej ajñenla ti i p'untyaya Dios. Bej pijtyanla i yorojlel che' mi yalq'ueñonla laj cuxtyalel mach'la yujil jilel ti lac Yum Jesucristo cha'an ti i p'untyaya.

22 Cotyan ti la' t'an jini max tyo ba'an mi' wen ch'ujbin.

23 Cotyan yaño' ba che' bajche' mi chancol la' chuque' loq'uel ti c'ajc yubil. P'untyanla cha'an la' cotyan, pero xuc'uletle. Cha'lenla baq'uen ame mi' bibi'tisañetla i pislel yubil ti mach'la wen ba i cha'lival.

Cojix ba t'an

24 Dios jini cojach ba am ba i ña'tyalbal, Ajcotyayajach lac cha'an. An i p'alyalel cha'an i cañtayañetla cha'an mach'an mi la' yajlel ti mulil. Añlax i p'alyalel cha'an i yalq'ueñetla ti i tyojlel che' ma'ix sajlic la' mul. C'ajacña la' woj mi la' wubin ti' tyojlel c'otyajax ba i ñuclel.

25 La' tsictiyic i c'otyajlel yic'ot i ñuclel yic'ot i p'alyalel yic'ot i wersajlel i t'an Dios cha'an ti lac Yum Jesucristo, am ba c'ala ti ñoj oniyix, am ba wale iliyi yic'ot ti pejtyelex ora. Amén.